

郭襄靖公遺集

郭襄靖公遺集卷之十四

莆中 郭應聘君賓著

年友漳浦朱天球君玉編

門人泰和郭子章相奎訂

門人晉江王任重尹卿校

不肖男良翰梓

諸議 巡撫廣西

巡撫條約

爲巡撫地方事本院猥以菲才濫膺重寄聞

命以來夙夜惶悚惟無以奠安疆圉綏輯蒸黎是虞
顧撫屬地方廣袤民夷紛錯不惟精神智慮勢所
難周而事機懸於呼吸民隱伏於幽微又有不可
以逆計而徧識者所賴同事文武諸司各殫衷猷
共匡不逮必使邊陲無烽燧之警田里絕愁嘆之
聲是本院所傾誠屬望者也除前院有行一應事
宜俱照舊遵行外所有申飭吏治慎固兵防清理
賦役脩明教化數事所關於

國計民生良非細故欵開如左合仰所屬大小衙門

逐一遵照着實施行

計開

一申飭吏治照得地方安危係民生攸戚民生攸戚係吏治臧否蓋自古記之矣粵西土瘠民窮百凡荒陋吏茲土者類多鄙夷其地鮮有久大之猷而志短途窮者又率秦越視民自爲封殖之計民之展轉流移者有以也頃歲

廟堂加念邊方多選俊良以司牧寄一時吏治翕然

稱賢而一二衰暮闕茸之徒不脩職業漁獵
窮民者間亦有之若不嚴行申飭何以登斯
民於理貽地方以安哉所謂吏治無他盡其
所以安民之道而已誠使爲有司者真有視
民若子之心痒疴疾痛舉切吾身暴征橫斂
朘削膏脂者奪民也吾安忍之酷罰淫刑文
致罪辟者虐民也吾安忍之濫費不經冗役
無節者病民也吾安忍之簿領生事胥隸作
威者害民也吾安忍之有是不忍之心必有

是不忍之政民之不安其生不樂其業者未
有也夫士人方窮居時見官府貪者酷者縱
容羣小昏懦無爲者嗤笑之怨詈之視之爲
何如人及膺民社之寄廼躬自蹈之不亦失
本心之甚耶况

清明之世方懸殊典以待循良示顯罰以懲貪暴乃
或不知所戒勉卒致身罹罪辱貽憂父母取
誚鄉隣又何惑之甚耶今後守巡各道并各
府掌印官以稽察吏治爲第一急務文到一

月內先將所屬各官賢否實跡如年力才識
操守政事分別明白開具簡要書冊仍於考
語下另註極賢極不肖字樣先行呈報以後
按季填繳間或初譽有聞而末節不繼亦或
新政未練而後效可觀不妨前後異同正以
考驗始末至於取人尤當先以大節爲本果
有實心實政終始一節卓然稱循良者本院
定行特薦以備破格擢用其貪殘不職者本
院不時叅劾拿問各道各府慎加鑒別毋以

兩可塞責有孤本院急於知人之意

一慎固兵防照得粵西之患莫大於猺獞但猺獞之不戢由於兵防之不固兵防之不固由於功罪之未明也夫夷獠之性雖曰靡常而出沒之由未必無故或因異省奸徒往來技藝而爲之交通或因軍徒犯罪投入窩藏而爲之鄉導或排年田主生端科索而逼起釁爭或附近村民挾仇詐害而激成變亂或哨守官兵地方千長恐嚇騷擾莫可控訴而使

之無所自容是皆官府不爲禁制不爲處分
之過也不能防之於微杜之於漸馴致延蔓
難圖其罪豈盡在猥獍哉又其甚者州縣官
以民壯打手徒備使令衛所官以旗軍餘丁
盡供役占營堡哨守官以募兵戍卒半屬賣
閑所謂簡稽訓練之法終歲無聞遂使軍兵
積弱防守久踈望敵先奔安可責以捍禦之
能擒馘之績哉及至地方失事百姓傷殘上
下相蒙恬不爲怪不曰兵力之不敵則曰成

勢之方張其提調哨守等官以僨事抵罪者
有幾況上而當一面之寄司一方之命者其
孰責成之噫嗟敝也久矣茲當古田蕩平聲
威震懾一時猺獍頗稱嚮風但居安思危之
心不容少懈轉弱爲強之計所當預圖除操
練事宜已經通行遵守自今以後一切兵防
事務各守巡兵備該道并叅遊都司嚴督府
州縣及守備衛所哨捕等官從新振頓如猺
獍何以招徠頑梗何以制伏騷擾何以禁戢

勾引何以防閑城堡何以謹嚴要害何以抗
扼榛莽何以開闢水陸何以廓清虛冒何以
稽查戎伍何以簡閱賞罰何以明信進止何
以整齊保約何以通行鄉兵何以團練凡所
以爲安攘之策無不素具遇有盜賊出沒各
該備守官員嚴督軍兵併力截捕獲有功級
照格給賞其有擒斬首賊辯驗真實定行破
格優敘如或畏縮逗遛不行拒守致賊侵犯
信地殺擄人民者該道即時馳報將守備而

下哨守等官俱綁赴軍門治以軍法事干有
司官一併叅呈以憑處治如悞事重大本院
身任封疆之寄自不容諉凡有地方之責者
不得不均任其咎也文到一月內各道并叅
將都司將所屬各衛所官員賢否實跡如年
齒精力騎射知謀分別明白開具簡要書冊
先行呈報以後每歲終一次填繳武職之考
往多忽畧有在任多年而槩稱新襲有偶因
小失而劣考終身有老壯勤惰全不相類以

致賢否多清委用不稱不可不加慎也

一清理賦役照得民間之利病莫先於賦役賦役不清則奸弊日積亂之道也廣西通省所屬額糧凡四十九萬有奇內八萬石折徵銀兩歲解布政司以供宗祿其餘糧米俱存留各府州縣備各衛所官軍及官吏師生月糧之需近據都司造報官軍文冊通省各衛所原額官軍共一十一萬八千八百九十八員名除逃亡事故實在官軍共一萬一千九百

四十二員名是所存官軍僅十之一則所費俸糧亦僅十之一耳官吏師生歲支無幾而前項存留糧米未見各屬升斗餘積以備作正支銷縱稱逋欠拋荒未必懸絕至此此所當清理之大端也其桂平柳慶等府田地因被猺獞侵占間有無徵但乘機影射在在有之豪右之家或有田而無稅貧窮之戶或產去而糧存或飛詭於絕冬或花分於女戶種種弊端莫可究詰又或編戶已納而糧里包

收或鄉民已輸而保家侵匿或佐領接受常規寬限不比或吏胥通同作弊批解不銷如柳州之融縣其尤甚者又若各項差役有榜編一倍而收三倍如門皂斗級之屬有榜編一倍而收四五倍如馬夫船頭之屬有已徵均平而猶日輪供辦有已納夫直而猶日役短夫又或全戶故絕而獨累一人或通里流移而獨累一甲或方向官而各差羅織或纔復業而諸色徵求其賠賾負累之苦有不可

以勝窮者若不通行清理則公賦愈虧民生
愈蹙上下爲之俱困矣但欲清理賦役必先
踏勘田土先該糧儲道議呈委官分投查理
已經詳允通行去後久未見報卽今地方寧
靜天氣晴明正當踏勘之時守巡道嚴催各
官速赴各州縣會同各掌印官將民屯田土
留心設法逐一清查置立魚鱗文簿州縣存
照其係徭徭地方尤當推誠開諭設法處分
使知莫非王土莫非王臣之義且爲之給以

由帖定其糧差使里排田主不得分外多取
期在來年春末通完造報該道仍分別各委
官勤惰通詳以憑獎戒各該守巡道通將所
屬民屯糧米及一應里甲徭差等項通行清
理何以使之不致侵漁何以使之不致虧累
務使民困得蘇公賦不損仍將各糧米原額
該若干踏勘過實徵該若干起運某處若干
存留某處若干每年官軍官吏師生約該支
用若干餘剩若干每年額徵夫直銀若干額

解雜料若干額編司府州縣各衙門徭役若干類造書冊送院轉發布政司彙輯刊刻賦役成規永遠遵守足國惠民莫此爲急惟各司道加之意焉

一脩明教化照得粵西士習民風自唐宋來夙稱淳美李彥弼記八桂堂云士知經術雖家貧未嘗廢學柳宗元作柳州學記云學者執經書引仁義中州之士時或病焉志宜者曰文物彬彬志昭者曰衣冠濟濟志悟曰京洛

遺風志邕曰人品同青兗逮我

國朝德化漸需文風益振材賢輩出至于今稱極盛
矣但或沿襲於膏粱或因仍於荒僻而違禮
越義之習間亦有之彼夷獠阻山負谷不聞
教化戕殺之性溷雜之居固無論矣卽冠蓋
所經聲教所及之地如喪葬以鼓吹爲美觀
婚姻以答歌爲媒灼競渡則戈矛格鬪趨墟
則男女奔趨刁民或軟血以聲寃奸吏至挾
官而干紀又其甚者或因一人有犯率衆以

凌轢有司或因一事不平造語以擠排官長
青衿之士不憚爲之如武宣之指執縣令上
思之排陷州官皆近歲事也其他侍親衣巾
之徒影射錢糧包占差役而把持挾制者難
以悉言凡此皆驕抗之習有未銷禮讓之教
有未洽所致也近該桂林守巡道呈議有鄉
約以訓鄉民有俗諭以訓猺獞提學道有教
條以示多士旣皆惓惓於移風易俗之意矣
誠恐循習旣久丕變爲難若不重行申明何

以益敦風教桂林守巡二道將原議訓民鄉
約訓徭俗諭嚴督所屬守令着實遵行務臻
成效左右兩江蒼梧各道各照書式一體刊
布使習染之污盡革真淳之俗復還雖阻山
負谷之夷悉變爲冠裳詩書之族可也提學
道考校諸生文藝固所不廢行誼尤所當先
使行誼果優卽文藝稍劣必加甄錄以示風
勸或蕩恣不檢及出入衙門把持官府者卽
以文藝優取亦必抑置不列以俟改圖如有

呈告侍親衣巾生員必行提調官及師生勘
結果係素行無虧者方行准給其係先年已
給者訪有違碍一併黜革又左江一帶近援
儒官事例告納甚多訪聞亦有倚恃官囊橫
行州里者談道遇有告納併加慎重示不輕
假庶幾士風益厚民俗尤有所感而興矣

右案行布按都三司

操練防守檄

爲操練軍士以重防守事照得省城係

藩封重地隄備之計不可不嚴雖歲調有土兵三千及湖廣戍軍輪番防守但土兵不諳紀律虛冒尤多戍軍更替無常僅堪城守茲欲簡稽訓練別爲一軍使緩急調遣有賴方可以振揚威武慎固兵防查得桂林中右二衛見在食糧旗軍共二千五百餘名而營撥外差及各衙門役占者居十之九又西北二營原設打手三百三十名月支布政司年例軍餉銀兩與振武營弓兵一百名係於附近各巡司抽取團操皆專備遇警截捕之用今則打

手以供迎送弓兵以充雜役是豈養軍設兵之初
意哉已經軍門節行清查坐委都司王德懋督率
操演但統領不一訓練未閑尚屬虛文未臻成效
况本官已奉齎捧之行若非另行責成何以圖裨
實用及照都司錢鳳翔戎務備嘗韜鈴素講司閩
閩中習知練兵之法相應不妨印務專一督理爲
此牌仰本司道卽便行會都司錢鳳翔并督同桂
林府捕盜官速將中右二衛旗軍內挑出六百名
二營打手募足三百名振武營弓兵查足一百名

通共一千名俱要逐名挑選精銳各用小牌懸註
年貌不許一名代替不許一名差遣都司查照閱
浙操練之規編立隊伍督習技藝鎗牌銃箭務使
專精起伏進止務使諳熟申以號令定以賞罰必
使湯火可蹈溪壑可赴以一當十以十當百一遇
地方報警隨所調發即可督率剿捕殺獲功級照
格給賞如有奇功軍門定行具奏破格優敘退縮
逗遛者必治以軍法不宥轉弱爲強全在此舉毋
得沿襲徃日下操旗鼓常套分合彌文取咲市童

貽侮醜類是所切望於今日也操練之初都司常
專管理俟有次第每都司二次該府捕盜官一次
本院每日發旗牌官督看仍各赴院田操該道時
加督視稽其勤惰本院仍不時親臨閱視而行旌
戒賞罰決不爲文具已也其合用領哨官員并旗
幟器械火藥犒賞等項該道與都司一併酌議通
詳以憑施行

右牌行布按都三司守巡桂林道

惠養窮氓檄

爲講求惠養良法以蘇窮氓事本院近自蒼梧回至臨桂縣大墟地方訪聞附近有地名南村乃東鄉二十六圖里分其村約有七八十戶夤夜焚燒房屋各挈妻子盡行逃去訪求其故則曰差役煩累所致也夫安土重遷人情之常乃至離鄉井棄墳墓燬室廬携妻帶子而逃移異處使人目之曰流民豈其情哉蓋萬萬有大不得已者矣臨桂附省縣分東鄉尤號近村民之不安其生且如此其他遐陬僻邑困於盜賊傷於水旱疾苦不能上訴

其憔悴怨嗟相率逃亡以苟全性命者又不知其
幾何村幾何戶耶噫嗟一民失所吾方憂之况舉
村數十戶乎况所謂遐陬僻邑而不及聞知者乎
本院有拊循之責聞之不能一刻寧處諸司道知
同此惻怛之心也况郡邑長貳最爲親民其忍恣
然視如秦越而不爲之所乎相應通行講求共成
休養之政爲此案仰本司道督同府縣掌印佐貳
等官速查南村居民因何差役重累致此不堪作
何設法招徠令其復業并將通縣里役攢造徭差

夫馬等項事務孰爲便民孰爲病民何者當存何者當革何者當損益變通與其益上寧爲厚下與其便於羣小寧爲惠及窮民逐一計議停安限三日內具由通詳以憑施行柳慶潯梧平南等府夏秋以來重罹水患民艱尤甚仍通行各道各府一體議處徑自詳奪

右案行布按二司守巡桂林道

禁約僭侈檄

爲禁約事照得廣西地方土瘠民貧閭閻困苦生

理蕭條卽 宗室之家亦多告稱祿食不贍婚葬
不能如期究其所由固緣物產之薄亦習俗相沿
侈靡無度所致也訪得省城內外人家飯僧供佛
習以爲常飲酒作樂月無虛日至如父母喪葬此
人子躄踊哭泣之時也廼有膚體未寒而金鼓笙
簫徹於晝夜殯斂方畢而筵宴享胙遍及鄉隣墳
墓不思培砌堅固而扎糊紙人紙馬獅象虎豹以
爲美觀一出城門哄然搶散如狂如戲是以哀爲
樂仁人孝子之用心固如此乎又如婚姻之家不

論男女輒用鼓吹送迎不問晨昏輒用銃炮起火
雖路遇官府而公然往來雖居近衙門而全無顧
忌況金鼓銃炮皆係軍中號令乃敢犯禁擅用又
豈知禮守分者之所爲乎其他僭妄侈靡之事難
以盡數不惟糜費錢財尤且玩違禮法相應通行
嚴禁以成禮俗爲此牌仰本司大書告示張掛通
衢曉諭士庶軍民人等知悉今後凡有喪葬婚姻
等事悉照文公家禮遵行不得妄用紙人紙馬獅
象虎豹及金鼓響器銃炮起火等項該司仍行長

史司啓 王知會嚴禁各宗今後務要敦禮尚朴
不得如前妄費以致缺乏之悔敢有故違者士民
拿究宗室叅治并將吹打人役製造工匠通行拿
問決不姑縱

右牌行按察司

稽查典禮檄

爲稽查慶

賀不行致詞有乖典禮事照得

元旦慶賀致詞祝

聖廼天下通行之典亦臣子尊

君之忱以故凡有藩府處所官僚於府行禮該

王叩祝無王府者則守土掌印者叩祝此載在令
甲凡以尊

朝廷也今遇隆慶六年朔日例於靖江王府朝

賀該本院同按院及三司等衙門各官員列班行禮
儼如

天威在上無敢怠越廼贊禮者初拜之後止唱衆官
皆跪卽繼以俯伏不聞祝

聖之音衆共聞之殊爲驚駭然方在行禮不暇問也
及後詢于長史司等官第云

殿下與世子久未出但以次子代祝今偶疾來遲故
不敢令他宗代夫 本王不行而以世子代之世
子不行而又以次子代之展轉相托已爲狎褻至
次子又復不行托疾省禮旣不白于未事之先廼
苟簡于當事之際其於

朝儀何哉且 本王之所以尊

朝廷即衆宗之所以尊 本王也今享大爵而不知

報効之圖當大禮而惟恃偷安之計是已不知有朝廷矣欲令行于宗庶也得乎於此旣廢何所不廢於此不行何者能行其爲不敬孰大于是除會同巡按廣西監察御史李采菲查議外爲此案仰本司會同按都二司行長史司逐一備查 本王果否有疾世子有何避嫌次子旣承父命何爲推避若果有疾何不預白該司及紀善典儀所等官何爲不行糾正備查詳報以憑施行蓋禮制久廢於因循固當亟反而儀典實關於

君上詎可凌夷該司務須秉公嚴查叅報以重愛禮
存羊之微意毋得遲違姑息

右案行布政司

清理軍伍檄

爲清理軍伍以實城守事查得通省各衛所旗軍
原額一十一萬八千八百餘名今實在止一萬一
千九百餘名是逃亡事故者十去其九查訪各軍
畏避差調或逃回原籍或潛避他鄉或投充勢豪
或假冒民戶各衛所掌印清軍等官不行清查任

其埋沒甚至包收月糧而縱容歇役索受拜見而私擅放回者常多又如各軍戶下餘丁俱應備操守城之數亦或任情役占或納價賣閑或生員之家指以幫貼書油或馬軍之戶假以輪養馬匹多方影射以致城守空虛遇警無備動輒召募土兵以充防捕甚屬糜費糧餉相應通行清查以實城守除省城已行桂林守巡二道會同都司清查編操外所據平梧左右江衛所俱應一體清查爲此牌仰本道叅即將所屬衛所旗軍吊取軍由格眼

文冊清查要見原額若干逃亡事故若干實在若干
干事故者作何勾補影射者作何清追及各餘丁
令各軍頭供結戶下人丁實數姓名年歲凡有影
射役占等項逐名清出與實在食糧旗軍操守餘
丁遵照本院近行案驗俱各編成隊伍練習技藝
該道叅時加稽查閱視務俾技藝精熟行伍充盈
平時以充城守有警以備截捕各衛所官員敢再
影射占恤者該道指實呈詳以憑叅降決不姑息
右牌行守巡兵備各道左右江叅將

查舉禮制檄

爲禮制久廢特議查舉以振頽風事照得人心之乖離由于名分之未定名分之不定本於禮節之廢弛節查靖江王府爰自大工獻助之時設建房長之後事權旣分宗衆遂叛其于朝叅畫押之規廢置殆盡又皆各自樹黨相助爲非如諸越禮犯分殊不可言甚至

祖廟祭享元旦

聖節等項慶賀皆安坐不行其能循禮守法節次

遵行者自本院所知不過數人卽未得名封者勿
論已允有爵封幾七八百員叨受

朝廷冠裳之榮祿廩之養在平時旣無分毫報答當
大禮各惟苟且偷安雖由倡率無人實則名分倒
置禮教廢弛莫此爲甚近該元旦不行祝

聖業已行查獨此彝章未復甚非所以一人心而肅
統紀也除會同巡按廣西監察御史李采非查議
及已往不論外爲此案仰本司卽行長史司啓

王知會通行出示曉諭各宗

聖節屆期禮儀宜肅俱要查照舊規隨班行禮至期該司將各宗支祿簿籍會同各司道督行長史司等官掣點其有不到明屬抗違卽具名照叅通詳仍將該員下應支祿米停止俟查叅明白另行請給毋得一槩支領遂致勤惰混淆以後凡有大禮均照此行庶人心稍知警畏名分不至蕩然毋得遲違

右案行布政司

重脩通志檄

爲重脩通志以彰文獻事查得廣西通志自弘治
癸丑創於學憲周君孟中至嘉靖己丑總督省吾
林公以師旅之暇檢閱舊志病其殘闕舛錯屬學
憲黃君佐特脩輯之甫脫稿黃君以省覲歸林公
親自校訂遂以鋟梓閱今又逾四紀矣雖山川名
物士習民風今昔一致而文教武功人材吏治以
及夷情民數之類固月異而歲不同者若不重加
裒集何以昭示將來該本院會同提督兩廣軍務
兵部右侍郎兼都察院右僉都御史殷正茂巡按

按廣西監察御史李采非議照文獻之徵莫先乎
紀載而編摩之績每屬於名賢今提督學校胡僉
事本以翰苑之英士林推重况司文衡之寄風教
攸關必藉纂脩方垂永久爲此案仰本司道卽查
自嘉靖己丑以後至今隆慶六年所屬各府州縣
凡應纂錄事宜廣詢博採參互考訂信者傳之疑
者闕之昔所未詳者增之昔所未及者續之朝風
弄月之詞雖文可畧阜民化俗之政雖細靡遺至
於武備夷情在邊方尤宜詳悉必使嶺表之文獻

足徵

昭代之典章具備是今日特脩之意也其應延問縉紳辟致儒彥與紙劄之費供餼之需一應未盡事宜該司通行酌議明白作速通詳以憑施行

右牌行布政司并守巡兵備各道

撫諭殘獍檄

爲開誠撫諭以安地方事照得古田自正德年間大征之後將兵卽行撤散未經留兵防守以致殘獍冥頑復行肆亂今

朝廷特設巡撫軍門駐劄省城專理軍務奉行

天討務爲久安地方之計大兵一進巢穴盡平軍門
猶念爾各獯愚昧不盡加誅仍舊招撫回村住種
將三鎮改爲土司屯兵防守以下六里分屬三鎮
使爾等各有鈐束不敢爲非久則兵獯相安各得
其所共享太平之福永無征剿之患是

朝廷設立三鎮正所以安爾等獯人也今爾各獯不
知 朝廷設鎮之意徒見狼兵在彼分種田土及
畧有騷擾輒生不平之怨動以報復爲心至如近

日大屋等村潛糾外獍逞兇爲亂被各鎮及柳州
哨守官兵殺獲數多其逃遁山谷饑餓而死者又
不知幾何此實彼等自取之禍當爲深鑒獨不思
三鎮戍兵雖各止二千自有三州爲他作主有軍
門爲他作主上有

朝廷爲他作主若爾等潛生異心不服管束縱使爾
等能敵三鎮敢敵三州乎敢抗軍門乎敢復叛

朝廷乎彼八寨素稱強梗尚且自請土官坐鎮爲彼
鈐束細小今爾等幸有三鎮却乃不知畏服敢與

爲仇豈非自取誅滅之禍乎爲此開誠再行曉諭
爾各里獐民知悉今後務各安分住種聽三鎮土
司管束共爲良民保全妻子敢再故違容縱細小
出外糾黨爲非者定行指村剿殺種類無遺田給
兵食妻子離散後悔何及其各村原設教讀生員
不惟訓誨獐童實爲開諭各獐使知

朝廷恩威設立三鎮之意本以安獐人非以害獐人
即使稍有供應稍有需求比之大兵所臨性命不
保妻子不顧房屋產畜一空孰爲便宜務將此意

時常曉示使彼此無間是卽變夷爲華之漸轉禍爲福之機也各生勤惰於此可見每月終將訓誨開諭過緣由開具小帖遞報該州類報軍門查考各生果有成效本院定行破格優處以償其勞必不吝惜

右給榜示發永寧地方張掛

申嚴保約檄

爲申嚴保約以安地方事照得政在宜民法貴持久不責其實則虛文塞責者多不考其成則勉強

一時旋有廢格之患上之人徃徃苦心積慮爲化
導休養之規以嘉惠生民者至勤至懇而澤不終
究功不竟成者皆職此之故也先據桂林守巡談
道議詳保約事宜刊刻成書已經督行所屬遵照
舉行一時會城內外翕然改觀而本院條約脩明
教化一欵亦旣申明遵守今左江蒼梧各屬方次
第行之矣近訪臨桂廂鄉保約雖已編立未見着
實遵行追呼搔擾之弊駸駸復起大非原議初意
相應申嚴以示法守爲此牌仰本道即便備云通

行所屬府州縣各照原議事宜加意奉行務底成績城廂內外府縣掌印官親行督率其各鄉村該道府委有行誼教官行之每年春二月秋八月仍委教官親詣鄉村一加申明以驗其有無遵守其原議不許點閘科擾不許差遣迎送等項永爲定規各該捕盜巡捕等官尤要恪遵美意毋得因循舊習縱容下人漁獵擾害自壞官常自今申明之後該道府時加稽督以此定註賢否以憑黜陟務使真德實惠淪洽於民心夙套彌文痛釐於今

日斯可矣毋得遲違

右牌行守巡桂林道

嚴禁冒濫名色檄

一嚴禁冒濫名色以重冠裳事照得冠裳之制

朝廷所以勵世勸功之典不輕以假人者自有倭患
以來東南地方多事曾經兵部題奉

欽依行督撫軍門遇有謀勇出衆建立奇功之人聽
軍門給以把總哨官各名色委用殺賊未嘗遽
榮之以冠服也近年多有異省無藉棍徒往往

營求各衙門跟用濫討名色劄付或稱把總而
敢爲張蓋要金或稱哨官而擅自穿補束帶橫
行街市凌轢軍民抗禮有司誇耀鄰里恣睢放
蕩無所不爲不惟冠服之羞且爲地方之害如
近日鬱林州張元臣臨桂縣白世循等俱經本
院查革外相應嚴行禁治爲此牌仰本司通行
守巡兵備各道叅將守備等官痛加禁革今後
但有指稱前項名色僭分凌人者許地方巡捕
等官不分何衙門給授就便拿解軍門追究發

遣其果係勇力智謀效有功勞者務要呈報軍門批允方准給以把總哨官等名色其把總止許帶員帽哨官許帶童巾俱不許濫假冠裳抗行官府按察司并在外各道仍出大書告示張掛曉諭都司呈總兵衙門一體施行

右牌行布按二司

申明切要機宜檄

爲申明切要機宜以圖全勝事照得除殘去暴原非得已之師而舉大動衆尤深臨事之懼所有軍

中一應事宜已經軍門刊布軍令書冊及節該各司道會議條件俱經陸續通行外誠恐人情易忽事體未詳茲將切要數條合再申嚴遵守爲此合仰監督各道統督叅將等官查照後開事理逐一着實施行仍嚴行文武大小官員及各土官頭目知悉以圖底績萬全毋得故違自干罪咎

計開

一主帥責任至重地方安危三軍號令係之各大小將領及各土官頭目其有不遵節制調

度者談鎮奉有

制勅事理徑自施行無容申飭其該鎮所至府縣及
一應軍前供事文職官員如有玩慢抗違致
悞軍務者五品以下本院徑行拏問如法糧
賞監督紀功各道一體督行共成托重之意
一賊勢有難易土兵有強弱獲功有多寡所貴
將領各官戮力同心殲夷兇醜以成同舟共
濟之義彼有踈庸異懦不能奮勵成功肆爲
擠排以掩己拙惡人之成幸人之敗是獨何

心嘗見往歲大征有自耻無功而中傷同類者今安在哉詩曰不忮不求何用不臧諸將圖之

一天下事當持大禮較大勢昔人以兵家之事譬之奕棋取舍弛張當以結局爲據非無見也各哨中有事體重大如違悞軍情虛冒功次侵欺糧賞等項情弊各道并各委官加意稽察所宜據實開報毋容隱蔽嘗見往歲大征有軍前與事官員或偶執見聞或徧徇善

惡不知彼已不究始終往往碎語煩詞爲一時阿媚計卒之地方既定是非昭然彼好爲攻訐者畢竟於人何損於已何益如洛容知縣余涵祇自爲累耳不可不鑒

一各土官世守土地人民其受

國恩至深厚矣竭忠圖報分所當然但非破格激勵則人無所勸除功成之日論功陞賞自有常典外今次進兵十日之後各監督道會同總統哨及統督官查本哨中土官最用命効勞

者及頭目最肯衝鋒破敵者開具員名并獲功緣由揭報以憑齎發銀花表裏用鼓吹迎進軍中獎賞爲忠勇之勸是在各道精以察之切毋濫舉使特行之典反爲槩及之惠則不足爲重矣

一密箐層巒諸徭所負之險長鎗毒矢諸徭所擅之技故雖大兵將臨而猶悍然自若者有所恃也伏弩夜衝尤彼賊常態我兵初進必無問晝夜毋分行止欽欽常如對陣不可有

斯須怠忽之心怠忽一生便隄防不周顧盼
不及而悞事大矣各統督及中軍領哨等官
可不加慎

一用兵以地利爲要計今兩岸巢穴幽阻人跡
不到地理險易卽所報嚮導未能周知我兵
深入何以明趨避而便分合爲今之計祇哨
時令守護旗榜軍兵就於附近村獐喚取數
人隨哨飽之酒食誘之賞犒令其指引前進
及破巢之後仍將生擒賊徒給以小票免死

責令供報某山某箐可以藏伏某村某寨可
以窩容某處應防衝伏某處應避箠簽坑阱
從而踪跡搜捕則地利賊情庶乎兩得之矣
一大兵旣進徭獍度不能敵非退據深山必遁
匿林莽各將官舊套一立營安穩之地輒憚
遷移而土官目兵又圖近市鎮安頓人口牛
馬之便結營常在數十里外故雖每日發兵
搜捕方至山箐又已回營宿食矣今日如此
明日亦如此往返徒疲而賊入山愈深入林

愈密班師之後復合如故此兩廣用兵之大弊也今次官兵若不隨賊向往移營窮搜致賊竄遁兵退貽害地方者有軍法在卽有他功仍行追論

一各路把截皆係要害之地往時視爲故事有名無實或兵臨而把截未到或兵進而把截先掣或貪功而移別處搜扒或受賄而縱真賊奔遁逸寇滋患所係非輕各監督道嚴行稽察有一於此從重究治如有截補功級與

臨陣擒斬一例紀錄

一功級紀錄或陞或賞係干

朝廷恩典豈曰細故往時各將官率將書識年伴寄名哨中又或徇情聽囑濫收隨用及報功造冊將土兵斬獲首級改與隨帶人役姓名遂使冒鋒鏑者不賞寄空名者倖陞其何以勸有功作士氣如上年龍英州斬獲二百八十餘功實錄不及二百至今勘辦未已其他舛落甚多此皆各統督官之過也監督紀功各

道務宜設法嚴覈毋容沿襲宿弊以負論功之典

一各徭徇占據田土戕害人民攻堡圍縣稔惡已久固皆

王法之所不宥者但就中較之兩岸諸徭日爲江道之梗不容緝事人等進入村巢其負固怙終無所謂玉與石者若三岡諸徭中間尚有一二聽招認糧非盡悍然無忌者特以爲惡者多而未甚爲惡者少致難分別然此心終有

未忍本哨兵進之時各僮如敢抗敵官兵自
取殲滅其勢難以姑息其有遁匿山林投戈
乞活者統督官用招降旗諭令蒲伏繫送監
督道取荔浦排年識認果係首賊仍從重典
或照山灣事例斬去大指釋之其餘脅從罔
治責令排年保認安插開其自新庶可少全
吾不殺之意仍計所招名數准作生擒功次
此本院真心也萬萬體之

右案行各哨監統等官

銓選教職咨

爲懇乞銓選教職以興人材以變夷俗事據帶管
府江兵備廣西布政司右叅政鄭茂呈稱永安一
州僻在萬山四面猺獞編氓鮮少

國初爲立山縣後廢爲古眉巡檢司至成化十三年
提督兩廣都御史朱平定之後始奏立爲州又
建儒學設學正一員訓導一員然自成化十四年
銓選學正陳論訓導李宗就之後一向未曾除補
該學印務俱係知州帶管即今生員止有二十三

人又大半爲別處寄學終年不聞講誦之聲閭巷
細民漸染夷俗不復知有綱常禮義無惑乎寇竊
頻仍禍亂無已也今幸蕩平府江又將該州高天
古帶六章等處惡賊俱行剿滅各處獐村無不聞
風屏息洗心嚮化此正地方更新之會也伏乞特
咨吏部軫念荒陬將原設學正訓導蚤爲銓選責
令到任或以生徒鮮少只選一員亦可但嶺外瘴
鄉中州遠道之人必不樂往即有除拜亦且棄檄
而歸合無於廣西桂林平樂二府所屬中查有年

深賢能訓導就近陞補學正其訓導即於附近歲貢生員內除授庶幾土俗相安化導易成數年之後或可變椎髻爲衣冠而銷干戈於俎豆矣等因到職看得學校爲教化之本師儒乃表率之官該州地方一向苦於寇攘學宮雖設而絃誦未聞官額徒存而銓除久缺今地方稍寧文德之敷正當其時也該道所呈無非育才興教之意相應咨請爲此合咨貴部煩將永安州儒學學正訓導乞賜就近銓選施行地方幸甚

右咨吏部

申飭善後事宜檄

爲申飭善後事宜以圖久安事照得經畧地方之道成功固難所以保成功尤難府江善後事體如設叅將改巡司列戍屯兵刊山通道等項已經三院會題奉有

欽依通行遵守但夷性無常反側難料地方甚廣防禦易疎若不嚴加申飭恐兵防漸虛夷心日玩終非久安長治之計爲此牌仰本道叅即便會同查

照欵開事宜逐一從長酌處着實舉行如應損益
變通不必膠滯成議務期民夷安戢水陸肅清以
永保蕩平之功是本院所惓惓屬望者也毋得遲
違

計開

一剿撫並用此馭夷不易之法府江班師之後
本院節行該道及叅將官將各哨漏刃殘徒
盡行招撫安插使之安生樂業永絕禍萌據
報已撫過猺獞僅六百五十餘徒而兩岸三

尚及仙廻南源江帶樊家屯等處所未及撫
者尚衆固緣殘徒疑畏未敢遽出聽招亦由
剿遺田土俱已分給屯種殘徒盡撫苦於安
插之難故也殊不知人不得食尚思懷竊以
苟活須臾况豺狼異類乎議者謂宜移南源
一堡而以其地盡招未附之徒與之耕食其
或不足又度他地以益之仍隸之里排責之
擔保使各有所歸則鈔掠之患報復之虞自
可少息

一兵法聚則勢厚分則勢薄查得兩岸三崗設立大小營堡共一百一十處分布周詳無非控扼要害之意亦便於屯種計也但計大營兵不滿百小營或止二三十名疊嶂層巒勢難聯絡卒有侵犯誰爲之援况皆列柵而營結茅而居一聞賊發輒棄去不守近日之事多有足鑒議者謂原設各險要營堡必不可少者宜堅牆垣浚溝塹置瞭望通井汲悉如近議行之使可戰可守屹然有難犯之勢其

非甚要害原止爲屯種而設者酌量歸併亦必堅立營壘使可恃以爲固而又立互哨之法嚴應援之令庶幾醜類聞風懾服不敢復生異心

一兩岸三崗屯種募兵共計六千七百二十餘名其數亦云衆矣近訪各統領人員或報空名以影分田土或捏虛數以冒領月糧或招徠種充兵或匿牛種入已或假脩造而役占多人或指使費而肆行科剋弊端滋起兵心

漸離恐殘徒伺隙乘虛爲患非淺諛道與叅
將官當不時稽覈加意禁戢老弱必汰虛冒
必清逃缺必補一切侵尅等弊痛行釐革如
統領人員仍前沿襲致啓釁端該道叅將指
名叅革另擇有才力者以充統領仍拿解軍
門治以軍法毋得姑息致懈兵防

一平樂脩荔各縣排年田主人等往時多與賊
通因以爲利近經剿平之後稍知斂戢然訪
聞一二奸黨猶且騙害未已恐嚇多端以致

徭徭之情不能上通官府之令難以下達日漸月積恐浸淫復至叛亂皆此輩導之也今各州縣有未聽撫徭徭卽責之各掌印官各掌印官責之各排年田主務令多方宣諭設法招徠失業者作何處分向化者作何寬恤仍責成擔保永不爲非若排年田主不能撫安徭徭者坐以縱賊之罪州縣官不能責成排年田主者坐以失職之罰其哨堡等官有需索徭徭者併聽州縣官參究責成旣專而

後撫處可固矣

右牌行府江兵備道并叅將王承恩

申嚴土官賞罰檄

爲申嚴土官賞罰以肅軍令事照得本省各府州縣司崗土官世享封土富貴亦云極矣揆其所由皆上賴

朝廷德威下有軍門號令以致四隣和睦各守封疆羣下歸心各守法度汝等方得以長保人民土地傳之子孫無侵奪爭鬪之禍若非

天威在上則强者侵弱衆者暴寡少者欺長卑者凌
尊隣封無非敵國左右無非讎人欲長守富貴其
可得乎欲常保土地人民其可得乎如昔年南丹
州叔姪之爭近年向武州兄弟之爭非有軍門爲
之主張處置則相讐相戕無有寧日是汝等坐享
富貴毫髮皆

天恩所及也汝等奉命出兵竭力討賊者正所以圖
報

天恩亦所以爲自全自保之長計也廼近年以來各

土官有驕蹇恣肆玩慢抗違或應調愆期或出兵
虛數或駕言內亂或託疾避難或縱兵擄掠或臨
敵退縮是不畏

朝廷之威不遵軍門之法莫甚於此日漸月積馴致
厲階是豈汝等之福哉獨不思先年思恩土官岑
濬何嘗真有叛逆之心只是抗命不恭肆行無忌
自取滅亡之禍近年忠州土官黃賢相羅陽土官
黃金彪皆緣驕恣自罹法網可不深以爲鑒哉軍
門今特開諭汝等知悉以前罪過姑不追論自茲

以後有功必賞有罪必罰奉調務要如期出兵務
要實數土官務要親領目兵務要精銳臨陣對敵
務要奮勇先登有一抗違即屬不法定行從重處
治官族頭目即以軍法殉衆土官盡法 題叅決
不姑息如各土官果能竭忠効力奪險衝鋒獲有
奇功卽將軍門預發空頭加恩劄付聽總統監督
道卽於軍前核實等第先行填給原無冠帶者給
冠帶有冠帶者准署職署職者准實授實授者准
加服色仍動支銀牌花紅鼓吹迎至行營加獎以

示優異其土兵斬獲功次仍照近行事例查實卽時照格給賞功罪賞罰一毫不爽凡汝大小土官人等各宜省悟遵守施行毋得執迷自貽後悔文到各具遵奉日期依准甘結先行呈報查考

右發兩江各土官遵照

分別討罪檄

爲慎加分別以明討罪事照得懷遠之師聲罪致討原議專在倡惡諸巢其餘悉從撫戢卽板江一帶諸徭雖亦上徭黨類但以不與殺官之罪俱在

撫處之列節行談道叅委官設法撫諭以安其心
以携其黨不意奉委各官全無撫處真心徒以虛
文塞責旗榜空給聲勢甚揚及大兵將臨懷遠殘
民原有寄住板江各村者皆探知官司之意先期
搬出遂致各徭驚疑糾連拒敵退兵損威復煩特
舉之議誤事之罪均有所歸節經牌行談道將悞
事員役嚴行查究再加設法分別招徠及懸示重
賞計擒倡惡去後久未據報今照徵兵集糧治舟
繕械其勞民耗餉已不可勝言及談總兵衙門開

報徭徒以數萬計且恃鐵甲之強據上游之險即使主客十萬官兵盡數湊集可以深入無阻擒殄無遺此心已屬不安之甚況兵機呼吸其可以逆覩易言者乎本院晝夜憂思至忘寢食懲前慮後惟有大加分別專鋤倡惡庶幾初意不失成功可期卽善後事體亦易區處查得原報殺官奪印止於稿黃大地太平河裏四港牙寨南寨周平選盆湧尾梁口大灘浙溪郡鄧等村寨及後聽糾越出長安亦止板江河潺猪肉田寨蕉花各村其餘並

未爲患即聽糾阻兵諸徭明係驚疑畏死之計於官兵原無損傷居民亦無擄戮其與殺官奪印者罪自不同安可無所分別一槩鋤勦以失

朝廷討罪之意相應再行督責爲此牌仰本道叅即將懷遠所屬村寨逐一審查要見某係民村某係伶徭徭村寨某村寨原係殺官奪印首惡某等若干徒某村寨原係被糾越出阻兵某等若干徒備開書冊仍畫圖貼說將民村填畫紅牌其餘伶徭徭村寨原未爲惡者填畫黃牌加以紅圈殺

官奪印者爲白牌聽糾阻兵者亦爲白牌仍加紅圈以示分別一面呈報一面速行選委有才幹心計員役督同江水銀鐵匠人等并魚樓馬架等村相信獐老前進彼中將板江一帶獐人并附近長安丹陽二鎮村寨獐獐多方撫化令其安心住種各保身家毋生驚疑及聽糾爲亂自取敗亡之禍如果真心聽撫責令相信獐獐或江水人等先行擔保刻木爲信待舉事之先令每一村或二三村摘取子弟一人送付擔保之家羈住每村給與旗

榜各撥軍兵及居民一名爲之守護彼此交質使其相信相安自無驚疑糾合之患又三甲等村殘民與潯江宜良二鎮狎狎并行加意先期撫綏臨期亦每村給與旗榜撥軍守護使無疑二然後麾兵專指倡惡村寨使黨與旣携賊氣自懾其向前抗抵者盡剿不宥遠竄山谷者姑免窮搜則

天威以伸 王法以正以全取勝之計當在於此其差委員役必須給與路費犒賞果能撫化得宜致無驚動糾結定以上功論敘其各該官兵軍民狎

犯人等如能遵奉原行設謀用間擒獻首惡者照
議卽時填給冠帶劄付或鎮撫千百戶等名色有
罪者并准贖罪仍加倍犒賞生擒者賞銀五十一
百至二百兩斬首者賞銀二十三十至五十兩一
毫不吝首惡如已擒獻則脅從俱可免治征剿卽
可免行此非本院一人私見謀之藩臬諸司無不
同聲贊可卽以質之督按二院均此同然之心是
在該道與叅將堅意力行同心協慮以圖計之必
就功之必成若輕信細民之言動曰必不宜撫必

不能撫或曰必不可分別必不可間誘擒獻仍前
苟且搪塞而務爲一網打盡之計他日萬有一失
則大小將領身任其咎固不必言談道之責皆有
不得而辭矣具行委過員役先行呈報俱毋遲違

右牌行守巡右江道并叅將王世科

再申切要軍令檄

爲再申切要軍令事照得猺寇倡叛法所必誅春
間乘破竹之威爲順剿之舉期於罪人必得

王法可伸不意官兵將臨敵境輒自退回夫固諉之

天時寔多由於人事將校鮮制勝之畧舛迕多端
士卒無奮勵之心逼邇可耻致煩特舉徵發騷然
上厯

宵旰之憂下重蒸黎之困本院責在調度媿負已深
況在行者能不慙憤今茲誓告再用叮嚀各該文
武漢土大小官員務殫厥心必底廼績共雪人神
之憤以洗退怯之辱庶幾保聲譽於平生綿祿位
於永世除原額軍令及重申軍令俱照舊遵行外
所有再行切戒十條開列于後

計開

一土官用命與否視將官之威令威令之行與否視將官之貪廉昔山雲號令嚴明不入土官餽遺以故土官奉令恐後所向成功至今傳誌稱之訪得各將官於土官謁見之時有受其土儀劔馬之餽有受其銀碗銀瓶之餽有受其折禮一二百金三四百金之餽甚至餽送未行而令心腹書識牢伴催促者有嗔嫌簡薄將應領糧賞魚鹽單票刁難不給者

有逼令目兵採造統督中軍領哨等官營房者有勒取頭目馬匹騎坐擅縛目兵作夫遞送者噫土官之餽遺安從來哉不過剗剗土兵糧賞以供此費耳惟將官一受鈎餌以致土官驕縱莫之誰何土兵搔掠恬不爲怪安能使三軍畏將而不畏敵可殺而不可敗爲國家雪耻除兇哉究其所由皆將官需索之爲害也今次訪有餽遺者將官土官俱行從重叅究雖有奇功亦不敘錄其隨帶員役有所需求

者通行一體拿問

一兵之勇怯係於將將之勇怯係於心兵法曰
以治待亂以靜待譁此治心者也故善用兵
者能使三軍齊勇若一豈有他道訪得各將
官平時意氣非不揚然壯矣廼至臨敵往往
倉皇失措漫無主持至有今日移某土官營
中明日移某土官營中進止猶豫不惟示敵
以弱而且倡兵以怯耻孰甚焉此無他保軀
之念重敵愾之意微也安能使智慮精專部

伍整肅三軍之士感憤而爭先哉今次各將
官痛自省勵務要

國爾忘家公爾忘身率先士卒以作銳氣視未戰如
將戰視既戰如未戰不可斯須怠忽致誤機
宜敢蹈前轍有軍法在

一土官功罪賞罰已經另行刊示申嚴遵守汝
各土官當思今日大舉之師百倍勞擾其故
皆緣汝等今春進兵之時退縮不前所致則
今日之舉乃汝等自贖之秋自全之地也汝

等須痛知此意又以此意痛諭目兵務要爭
先向敵誓與此賊不共戴天遇險必奪遲鋒
必衝雖危不驚雖挫不潰必收萬全之功使
遠近徭獍聞某府某州縣某司崗土兵精強
破膽落魄何等氣焰何等聲名贖誤事之罪
効報

國之忠隣封孰敢不畏左右孰敢不服如或仍前驕
恣不務奮勇立功

國法森然決不輕宥

一地方連年用兵柳慶二府經過民獐村落被
土兵搔擾已極而融縣尤甚除暴本以安民
乃爲民害若此卽能成功於心何忍今次守
巡二道宜萬分於此加意將應發旗榜差錯
的當人役先期守護仍諭令各村民獐照門
廣大征事規將人口牲畜寄放三十里外以
避掠取之患如各州司土兵敢有仍前擾害
總統哨弁統督官責令各土官將生事土兵
及本管頭目拿赴軍前斬首殉衆毋得一毫

姑息自招故縱之尤如各土官占愆不行拿
送處治指名叅究雖獲有功亦不准錄其各
土官有能約束兵衆不擾地方者事寧之日
監督道并總統哨轉報軍門特加優敘決不
爽信

一細訪賊中之技鐵甲重綿疾趨則仆員木輕
艇少側則傾大弩勁而難攀長鏢遠而無力
以故從來不敢遠出出必遭創而歸春間兩
劫長安俱被兵民挫敗此明驗也况山皆土

嶺水無灘濤其險亦不足深恃只緣融縣奸
民居食賊中者多惟恐賊破之後失其常利
駕爲危言恐嚇衆聽動以丙午失利爲詞遂
使將士惶惑舉動周章遲回退却皆此輩之
爲祟也殊不知丙午以數千之兵當四征之
後深入無援宜其不能取勝今以十萬之旅
如霆如雷

天威所臨無不震疊使大小將官謀猷素定號令嚴
明何賊之不可平何巢之不可破耶如有奸

人仍前恐嚇將士妄言阻軍者監督道緝解
軍門治以軍法

一諸賊稔惡不悛自干

天討固不敢徒事姑息以貽後憂但

帝德本於好生

王師主於聲罪况公私之費轉輸之勞尤有不勝其
騷動者今日之舉若渠魁可獲則脇從不必
窮誅若

國法可伸則時日不必持久要在地方寧戢得善其

後足矣兵法曰兵貴勝不貴久又曰戰勝攻取而不脩其功者命曰費留是皆良將之所慎者也本院此心誓諸

天日期於靖亂雪憤以謝罪愆如以一毫希倖之心行之明非幽責其何敢逭各共事文武官員其胥體之

一三甲殘民久陷虎穴一二無良之輩習於冥頑坐視其變而不拯者誠有之但本吾赤子也當時縣官酷虐太甚已自失其父母之道

虐之則仇不復有捍衛之義固出於情之無
知亦勢之所不能禁也其在今日當亮其勢
當原其情兵之未進則招徠之守護之惟恐
少携其心兵之已進則安戢之保全之母容
軍兵一毫擾害庶幾杜其外向之念而漸回
親上死長之心卽將來善後亦有所藉若曰
日前之事彼等明明知情明明向賊卽擾之
亦不爲過是速之使叛非本院之所敢聞也
向背安危之機實係於此各道及各將官其

慎之

一上兵伐謀其次伐交懷遠東西北各界如白
果青麻等村獐人潯江倒江等村獐人都天
黃土等村獐人以及上獐籠七寨一帶通湖
貴等處村巢下獐大田蘆一帶通羅城等處
村巢皆與縣治隔遠原未殺官抗師已經節
行談道差官撫諭梟報主簿李材名色鎮撫
朱萬世等俱已招出各獐老獐老赴道投見
受賞誓神願出丁壯以報效殺賊矣夫善用

之則以夷而治夷不善用之是助虎之翼而益吾之敵也可不畏哉當悉照三甲例各道先期差人守護兵進之時各統督官嚴行禁戢毋容軍兵驚擾致起異心敢有焚燬房屋掠取人口牛馬及妄殺以充功級者統領等官與土官俱行從重叅究土兵聽總統哨拿至軍前以軍法處治

一糧餉器械船隻水手一應軍需俱有定派但殘疲之地人多玩愒倥偬之際事易蹉跎往

往名爲已備而猶缺漏未齊名爲已發而實稽延未集者如春間退師之後在將領則諉曰無船渡江在有司則稱曰同時併發而中間委托之非人篙槳之未具江灘之延阻或不能無其他率多類此所係於軍機非細故也今次糧賞監督二道嚴督分理官員先期料理務使一一有備庶無臨事之患其差用人員及嚮導江水人夫水手諸色人役合用口糧飯米等項俱預行便宜處給毋得過於

拘滯愴吝遲延以致脫逃耽閣有誤大計

一兵法曰上下同欲者勝言師之道貴和也天時地利不如人和聖賢記之矣歷觀往昔未有不和而能成功者今春之事足爲灼鑒今文武大小官員務以體

國安民爲心同舟共濟爲念一毫私仇小忿不以介于胷中凡進止分合機宜統督叅將都司及哨隊等官悉聽命于主帥而主帥亦貴能容凡一應處辦供需有司及分理官員不得少

有稽誤而將官亦貴能體其或彼此意見間
有不同必協和參酌歸于至當或軍民事體
稍有未一必通融應濟期於有成其要又在
監督糧賞二道爲之調停處分使上下大小
無不一德同心急於奉公之義如有故爲異
同互相憤激因而抗違阻撓者各道據實參
究毋容有所偏護致誤軍機

右案行各哨監統等官

清理賦役檄

爲清理賦役以厚民生事案查先據糧儲道議呈
委官丈勘臨桂等縣田糧查究埋占欺隱等弊已
經前院允行議委平樂府推官梁直丈量臨桂一
縣田地及該巡按御史李會行具

題去後續該本院節行司道酌議只宜清理將來不
必追究既往一切影占罪名及花利糧差等項悉
置不問惟欲小民田糧明白差役均平以免賠賂
逃亡之患此本院真心也後因事體浩繁添委多
官分投勘理據各造報隱漏多端在城廂爲少而

鄉落豪右尤多在東南二鄉爲少而西鄉尤多至有戶載糧米不滿一石勘出田土認糧一百餘石者一時士民無不歡欣稱快本院亦私竊慶幸庶幾疆界可正賦役可平迺自去秋以來士民輒有後議或云分委小官徇情輕重或云報丈人役信口參差或云有數無田或云將荒作熟或云官田槩科一斗六升原係八升一斗者是倍其數或云糧額復至三萬五千視節年止納一萬八千者是倍其徵遷延畏避不行投遞親供遂致黃冊久未

攢造糧差反多耽悞甚者有廣西百姓從來福薄
幸得蠻賊既平有田可種却又丈量加稅無地逃
生之說噫嗟本以爲民也而反病民是豈本院之
所忍聞哉夫嶺外法網素踈埋沒影射之弊積習
既久而且忘其爲非法一旦檢止稅額遂相鼓煽
附和怨議紛紛誠有之矣但欲厚不欲困者民之
常情損上以益下者政之大體况田土腴瘠之等
原有不齊皂卒輕重之間難保無弊官田之一則
已出強從糧額之取盈更違衆願若不再行處理

則田里不免愁嘆之聲奸豪益遂隱逋之計攢造糧差諸事率致耽延廢閣反以滋弊藏奸是小民之情終闕而不達公府之法竟格而不行旣非政體所宜尤失厚民初意相應通行酌議爲此牌仰本司道卽便會同守巡桂林督冊各道將臨桂縣丈量過田糧備加虛心體訪設法處分要見丈勘已明者有無允服畏避不出者是否虛增不均者作何以均之未明者作何以明之官田則例應否再減六升通縣稅糧應否仍拘古額或選委廉能

官員摘行查勘或專責各里長從實首明務使
豪右欺隱者固無所售其奸小戶貧窮者不至重
罹于困立一法使不致一弊之生寬一分使明受
一分之賜苟可通變宜民不必膠固成議限十日
內具由通詳以憑施行

右牌行布政司并糧儲道

郭襄靖公遺集卷之十四

終